

無不宜齋未定稿

杭城並江而東數十里邨落其蠶桑之所息績絲以爲縑紵竹左響右應相接十餘里近造

乎無聞兒童授邨書未竟卽謝業而他務自其高曾之所誨教儕偶之所詔語惟是課責筋力勤者爲賢計較錙銖纖嗇仰有取俯有拾搢搢然卒歲悶悶然終身積久而風俗成故垂纓振裾之士不接於目長者之車不逢於道見有整衣履輒詰問事何事數百年來習舉子業而步黌宮者視若景星卿雲無以眩耀聳動其耳目若忘其世固有大雅之一塗也 國朝重熙累洽文化覃敷譽髦不擇地而出而吾鄉揚嘉橋翟氏始以詩書

鳴翟氏一門少長皆讀書文采斑斑蔚若於菟其仲氏  
晴江爲尤怒以其經藝之餘力汎濫及於古籍山經地  
志稗史說部佛乘道誥之蒐瑣尚蒐獵而弗炙之其他  
益可知著書矻矻不休成數十卷尤長於詩他人蹙縮  
不能道一字晴江譬欬抒千言一題或數十首險韻或  
疊三四至於十於體自三言及八九十言無格不備能  
於奇窘艱仄處翺且翔焉極掉臂游行之樂少年結東  
臯吟社時才氣已若此吾浙國初衍雲間派尚傍王  
李門戶秀水朱太史竹垞氏出尚根柢考据擅詞藻而  
騁轡銜士夫咸宗之儉腹咨嗟之吟擯棄不取風雲月  
露之句薄而不爲浙詩爲之大變晴江嘗再入都得與

當世秉文幟鉅公通晉謁若鄭筠谷侍讀金江聲憲副  
杭堇浦編修等及浙東西諸名士交雉鴈訂縞紵人人  
皆樂得晴江晤朝夕當其清觴酌花別袂贈柳頻預高  
會於盟文歆墨之壇其聲明儀物之所臚列包匭之所  
貢納未遽在執蒲穀以下而主盟諸公於晴江隱然時  
有所畏蓋其詩實入浙風時尚之殼故能聲譽著稱若  
是歸而篋衍告滿四方之士來求晴江之詩十手鈔勿  
供乃謀付之梨棗而屬序於予維樹虛學勿竟志甘心  
伏野以老立身未能取信於世譏讒交至烏足以序晴  
江之詩令其取信於天下後世之才彥哉顧晴江視予  
爲鄉曲舊人交又最久遠沛其聲而遺其近侶雖謫陋

勿欲棄也是屬序之意也而予又幸鄉里中傑然起晴江一人破野田鄙瑣荒陋之習而扇以詩書之風香以騷雅之氣爲數百年來萬數邨落發其聲光遠近父老豈無有豔其文采而教其子弟事學者乎吾之子若孫得無有藉晴江之交遊而得扶大雅之輪以振作者乎太平無窮薰染無盡將見阡陌之中詠菁莪而歌金石之子肩背相望化樸野爲華腴實自晴江開其先則予雖不足爲晴江輕重上以歌

帝化下以誌鄉里之慶亦野老之任也序其何敢辭

乾隆壬申夏至後臨江鄉人吳樹虛序

無不宜齋彙目錄

卷第一

古今體詩共一百十六首

丙辰至己未

卷第二

古今體詩共八十首

庚申至癸亥

卷第三

古今體詩共一百九首

甲子至丁卯

卷第四

古今體詩共八十三首

戊辰至辛未

無不宜齋未定橐

卷一

仁和翟灝晴江

甘棠邨襍詠

并序

予居臨江鄉去城市遠風土幽奧家勤于農桑有幽人風宜于詩凡觸趣會予一一詠之存如干首舊編圖籍經界次以周興嗣千字文而予居適直甘棠二字又近里有百年老棠樹遂以名村後之按志者知臨江鄉有甘棠邨自予始

傍舍清瑤流浮空光可掇沙雨隔宵添沿花路八達  
扞  
蛟  
艇  
舟  
興  
至  
一  
櫂  
撥

港

鄰界水東西行空一虹貫凭闌俯倒影鬢髮石髮亂誰

某記題名沙侵石未爛

橋

漁火不隔岸密繫柴籬根瓦罏爨荻葉濁酒分兒孫人

家值水缺連補成完村

漁舟

芄桑一色鋪儻莽不知處凝光變須睂綠天迴殆庶下有竊脂禽翻飛自來去

桑林

桑土亦宜田當年未曾闢舍北頗閑曠一犁試芟柞雉  
雖春雨餘顧盼好禾麥

田

町畦縱復橫楸枰畫方罫天晴蚓竅啼風定蜺絲挂鄰  
丈共忘機翦蔬約宵話

菜圃

暗脉通遙泉湛湛水花皎比屋動晨炊銅餅出未了輾  
輓轉桐床驚起棲桐鳥

井



笠影覆瀟灑四望碧陰開援琴坐石檻粘破新莓苔臨

風七弦寂美人來不來

亭

市酒紅如血邨酒白如雪只道市酒濃不知邨酒潔竹

外一帘斜試與銜杯說

酒店

茨簷碌碡塲小業著方賄晴絲曳長空衆星排磊磊居

然握經綸託術詎嫌猥

綾塲

鯨魚百千頭淥水四五尺蘋風吹澹沲烟草共一碧釣

魚人不來鵝鵲立釣石

魚池

登樓開北檻對面皋亭山野淨寒木疎天淡孤雲閒此

中有真得獨坐怡妙顏

遠山

吾愛村夫子敦學存本意不藉占巍科所在略識字狙

公調羣狙慢言莫輕戲

塾

破殿雜筐籛古佛坐逼仄孤棲壞衲僧刀耕自食力無  
才掉清機客來相對默

僧舍

倒竹屈成籬籬光仍綠潤作折讓漁磯聯疎借木薜固  
藏隱者心野月漫閒進

竹籬

參騰蘿薦秀卓立風雲高儼然一村霸氣勢矜雄豪瞻  
衡作標識遠勝旌與旄

喬木

冥冥風雨宵孤燈一杠揭熒光散空虛燦逾田燭設夜  
闌歸人稀隔林自明滅

天燈

寒原鷄犬靜幽響出蘿幄天晴孤枕明遠近聲曝曝懶  
窳暗驚心起看河射角

機聲

雨後晚歸訪吳西林隱君

過雨碧林下東臯踏屐歸餘涼倏如洗殘日不成暉夙  
念青雲器閒尋白板扉知君頻謝客爲我獨依依

石門道中

縑絲聲裡雨初晴滿路飛花客子行麴水一程通橋李  
翠屏幾摺到臨平片帆風急舟輕度側岸繩牽樹倒迎  
取次殘陽沙渚落陰陰桑柘接溪城

縑絲行

春蠶老去辭筐筥寸腸宛轉絲千縷鼎湯初熟蟹珠繁  
縑絲車上烟如雨一縷未斷一縷連一聲旣往一聲還  
鎖星鼓動環繩轉幽牕軋軋吟新蟬綿延脆緒引未極

佳人撒筯長太息。吳儂一月廢佳眠。養得蠶成幾金直。  
臨晨剝繭赴繅盆。身炙手烹勤作力。下車收控雪絢絲。  
鳴機不待蟲摧織。可憐用盡細工夫。紵絹何曾自光飾。  
不見少年沉醉美人家。纏頭拋擲賤泥沙。

村中晚興

所居地幽寂。薄暮客來稀。一徑吠寒犬。數家鳴夕機。厨  
烟補山翠。林篠暗柴扉。蹋葉忽聞響。鄰翁散社歸。

橫塘

猪坊鴨舍名二橋短長橋。擡出江鄉路。不遙記得往年曾  
借問。白荷花外小停橈。

夜卧聞潮

空階白月當中宵寒蛩四壁鳴蕭蕭哇咬入耳細已甚  
轉令覓夢思英韶天公解我胸次闊特遣海若揚秋潮  
初時但作炊飢響忽然號怒奔驚飈千槌鼓擊萬虎嘯  
軒窗戛戛恍動搖我時披衣不得卧寸腸展轉生憂焦  
連年江岸苦衝嚙瀕江田宇多傾漂飛章上請泉府  
發痼瘵厘慮勞天朝新塘創築亘百里千夫日日疲  
征徭乘秋漲溢潮更猛官立程限誰寬饒但得魚龍一  
睡穩長波遠赴歸墟消東鄰西舍各高枕吾耳豈復嫌  
清寥

和戴問渠南樓晚眺集杜四首

天畔登樓眼幽襟興激昂烟霜淒野日雲水照方塘  
天畔登樓眼幽襟興激昂烟霜淒野日雲水照方塘

畝孤城外柴門古道旁長歌意無極回首一茫茫  
靜者心多妙巖然耳目開無人覺來往倚杖更徘徊落  
景陰猶合歸林鳥卻回樓高欲愁思羌笛暮生哀  
勝地初相引題詩好細論山虛風落石月掛客愁村野  
樹侵江闊城陰帶水昏浮生看物變懷古意空存  
遠色有諸嶺邀人晚興留秋風吹杖几落日在簾鉤天  
地空搔首行藏獨倚樓眼前今古意庶與慰沉浮

赤岸村

山塘十里五里村落三家兩家野曠最宜踏月地閒儘  
可栽花

雨夜發海寧訪俞祇文孝廉始乾明經

行人爭渡急。渡口正黃昏。出港寒烟靜。鳴橈細雨繁。菰蒲平蟹岸。燈火溼漁邨。不負故人約。扁舟繫郭門。

龍神廟

貝闕珠宮耀海山。瑤梁珊樹錦爛斑。人間巧盡般倖手。只恐龍公視等閒。

登占鰲塢

孤墪撐空表層楹。洞達開盤蛇。遵曲折攀鵬。據崔嵬。海勢隨天闊。濤聲撼地來。六鰲蟠處近。髣髴見鱗頤。

海塘鐵牛

大禹鎮洪水。鐵鑄殷鯨牛。跨身河南北。遺廟祀陝州。咄哉東海濱。覩此神物畱。誰爲舉鞭箠。千里遙奔投。要知

捍護策取法貴千秋作聖述者明先後同謨謀五行具  
生尅斯理若可求土牲氣臨壓制水成安流蛟龍仗尺  
木金旺勢自收狀獐威力逞質重光氣浮辛壬識年月  
乳篆勾雕鏤文犀覺形猥掉尾隨潛蚪絕岸起如郭耕  
作盈田疇假茲一牛力坐抵千鋤耰旒旗牧人夢衽席  
登優游宴波永不溢圭臬通荒陬萬里黃支國納賁朝  
珠旒

偶步東園

列隧千重比戶饒閒身端合避浮囂桑畦遠隔人家小  
菜甲平連雉堞遙東郭自來堪踏雪南湖好在復通橋  
邑居仍作荒郊看林下何須杖策招



海門歌

海風浩浩吹海立嵯峨化作千石級東西對起兩角觶  
朝時陽開暮陰翕江斐海童相出入浙流萬里日噓吸  
中傾建瓴箭馳急天然設險制巖邑峽口龍門擬可及  
爲雲爲雨楚襄王爲雨爲雲楚國亡雲雨今歸何處去  
不堪回首望高唐

夕陽

春游意未歇日夕傍西崦虹腰彩氣連鴉背金影閃平  
川樹無翳遠目看徐歛翻壁動鱗鱗隨帆去冉冉微黃  
賸山額繪筆難渲染曝衣誰家樓人寂窻未掩歸路少

徘徊暝色送青點

咏煙草

耕地栽瑤草能令四德俱

崔林玉露載檳榔四德醉能使醒醒能使醉饑能使飽飽能使饑或卽以評煙草

占肥同黍麥望影接芟蒲載採香何烈云黃葉已枯縛  
箱通遠賈懸旆售交衢柿削堆初積絲分縷不麤輕柔  
搓柳綫瑣碎落金麤蘭屑紛攪和蘇膏暗洽濡慕羶情  
自切嗜炙性無殊費薄錢挑杖饒深唾漬盂細筒裁竹  
箭夾袋製羅縠佩或隨鳴珰攜常倩小奴鍤金抽箇簞  
律管實葭苧藉艾頻敲石圍灰尚撥爐乍疑伶秉籥復  
效雁銜蘆墨飲三升盡烽騰一縷孤似矛驚燄發

漢西域傳車師

王句姑家  
矛端生火

如筆見花敷苦口成忠介焚心異鬱紆穢兼岑

草亂

吳越春秋越王病口臭令左右皆食岑草以亂其氣

醉擬碧筩呼吻燥寧嫌渴唇津

漸得腴清禪叅鼻觀沈渣潤嚙胡幻訝吞刀並

張衡西京賦吞刀吐

火雲霧

寒能舉口驅

吐氣成火事見葛仙翁別傳

餐霞方孰祕厭火國非誣

繞鬢霧徐結盪胸雲疊鋪積青凝斗室橫碧漾紗幘七

灼心除痰三焦胃滌汚舍來思邈邈策去步于于款客

猶先茗澆書不待醺澀回嘗橄欖疫辟浸茱萸洱海諸

糧紬番禺蒟醬輸作騷多臍馥採藥早遺珠郭璞箋仍

缺嵇含狀莫摹滇南功獨奏閩右路羣趨種未周三甲

風先布八區

景岳全書烟自萬歷時始出于閩廣間向以征滇之役師旅深入瘴地無不染病獨一營安然問其故則衆皆服烟由是徧傳

相思名旂旄

俗稱相思草

呵應語模糊

田雲黔書黔人以食烟爲呵應

損益人憑說

幸芳爾不渝詩腸感熏染吟謝淡巴菰

寄懷厂阿上人

口業乘除筆硯功，莫將心地等頑空。  
平山堂上揮犀說，笑殺一羣獅子蟲。

立夏後五日薄暮驟雨卽晴

墨雲齧齧西南來，狂龍挾勢驚奔雷。  
夕陽倉卒收不及，劃住半壁青天開。  
銀河倒瀉力士挽，林端咫尺諸峯遠。  
迎涼未擬掩書幃，蟬竦低掛桑榆晚。

桑樾

髻兒爭拾滿筠筐，纂纂猶餘陌上桑。  
紫玉碎雕肌綻粟，元珠新摘膜涵漿。  
爭差鶴頂楊梅潤，壓倒龍綃錦荔香。  
不道吳蠶知食葉，卻輸佳味與鳩嘗。

臨平禠咏

蜀桐吳石闕聲靈鳳翅高張一抹青橫榜孰書同口字

夕陽飛燕滿空亭

桐扣山西爲鳳皇山俗云同口見周益公題跋夕陽飛燕子元釋明秀況桐扣句

石函文啟兆亡吳矯詔徒憐赤水污轉怪後庭歌未歇

賣身先作佛家奴

石函見三國吳志矯詔赤水見晉書相元傳及水經注佛奴見南史陳後主紀

擲杖深山起籀龍管城子並受斜封騎驢獨自來深塢

不見當時野鶴踪

咸淳臨安志安隱院地產曲竹唐邱隱士丹成羽化植杖生此三四本顧通翁葦蘇州贈邱詩

亭亭香塢闖空林憑仗蒼駝巨力任怪底浮雲遮不住

一尖常刺別離心

老學庵筆記臨平山爲駝形駝負重則行故作塢於驢峯東坡詩一別臨平山上塢五年雲夢澤南州

菱花種出幾經年竹色池光鬪碧鮮翻盡茶經并泉品

僧寮誰試雪甌煎

當年陸羽空收拾遺卻安平一片泉東坡詩今刻泉上

西湖歸道出東湖七字詩成賞大蘇六月臨平山下路

更誰寫作藕花圖

吳幾先論參寥詩五月非荷花盛時只云六月亦豈不佳見放翁筆記宗婦曹夫人爲參寥作臨平藕花圖見

朱昂續  
龍巖說

古鼎湖傾瀉怒瀧永和隄築駕雲杠蕭條景物端如故

水鳥時時下一雙

許應龍永和隄記隄阻鼎湖白龍潭之險趙希樞臨平詩市井蕭條景物非居人猶號永和隄

鎮上人家雁齒羅前臨官道後官河麥風梅雨新絲候

兩槩迎來販客多

成化杭州府志海寧與仁在上塘蠶絲臨平市貿易爲多二三用楊誠齋汪浮溪通臨平詩語

### 笕橋途中作

淺笠輕衫得自由近郊閒趁晚晴遊翠陰夾路忽成蒼  
涼氣襲衣先報秋園朵欲攀搖未定井華待汲去仍畱  
烟邨曖曖遙相引幾處柴扉傍竹幽

檻熊

熊絕有力亦曰麕托居深在芙蓉巖輕能緣條猛拔樹  
捷足遠過銀蹄颿獸權不使虎豹擅况屬狐兔獾狼獬  
胡爲鬱鬱困茲土木索寸比周如函低頭伏作乞食狀  
給肉迺令山僧監大腹彭亨舌舁蛭微腥何足解貪饞  
從來尚力必至困此理所在人禽咸猩猩長啼萬萬笑  
各見五體遭屠剮吾聞汝類螫蟲螫涉冬往往藏空嵌  
胡不終若元豹隱飲泉食果栖松杉乃復當道露其醜  
使彼獵者驚僂僂周施網罟牙爪廢雙蹠幾致和酸醎  
生居牢籠尚汝幸豈必溼我江州衫世間良物且受制  
言鳥戢翼馬投銜

九秋咏和家曉江大兄

閭闔西南至遙驚萬里秋  
刁調林襍語飄忽葉長流  
帶響搜空穴齋涼入小樓  
年華吹漸去愁絕客淹留  
秋風  
秋至分明見橫空白練痕  
迢迢通海脈宛宛界星垣  
洗甲餘波挽旋乾倒影翻  
仙查不借便誰與遡真源  
秋河  
蕭雲晴不定斂色變迷漫  
滅景催成晚蔭空停作寒  
窻非遮樹黑天要護霜乾  
樓上人搔首戎戎醉眼看  
秋陰  
天標氣挈斂不雨自冥冥  
秀竹吐寒白積虛凝暮青  
神工經幾洗畫筆許誰形  
淡極猶生艷閑花開滿庭  
秋色  
風林除碧障萬里景澄鮮  
點染惟容月褻裊始認天  
高樓思不盡獨鳥去無邊  
宇宙自軒豁人生何跼蹐  
秋空



陡澗從空劈雙厓壓路深泉高晴噴雨蘿密晝藏陰古  
樹經千歲清猿時一吟懸知龍蟄處未敢久窺臨

秋礪

關心河畔草極目水邊洲白露年年節斜陽處處愁啼

蛄弔幽夜牧馬散高秋欲共羈均語沅湘未可游

秋草

腹瘦已如此胡爲怨滿腔參春勺漏滴酸耳到鐘撞破

壁斜穿月孤衾淡照釭草頭應露重移響入幽窗

秋蛩

何人信高潔徒爾愛孤鳴秋杪不知歇夕陽無限情殘  
音移樹遠微思入霜清我亦蘇門客臨風嘯一聲

秋蟬

和戴問渠許滄溟兩處士重九前三日登吳山

韵

吳山秋淨轉崔嵬二客招同眺遠回賞節不拘重九日

登高應上大觀臺。長江潮擁鷗沙落。遠嶠雲連鳳翼開。  
醉倚石闌看不厭。夕陰亭外雁聲來。

題畫冊

日落晴川空隔陂。烟樹遠家在板橋。東抱楫歸來晚。

偕吳西林沈立人過沈翁宅看菊

節物驚心屢自牽。迢遙石徑埜林邊。碧山小約日多阻。  
紫艷繁開秋可憐。便欲偕花永今夕。誰能稱此賦當筵。  
孤芳莫嘆時遲暮。翠杓綠尊逢少年。

寒枝香遍我初來。白板雙扉傍水開。北郭此時堪照眼。  
西風何處更登臺。愛傳繁品能干朵。可有餘情戀一杯。  
但使百年多暇日。荒籬隙地儘栽培。

江口望隔岸越山

曠懷臨清江一洗塵目暗渚影辨空濛潮光瀉瀏濫青  
鬟何婉孌凭流下窺瞰仙裙疊皺多畫筆描痕淡盈盈  
水一方接就想能暫試因五兩風自解百尺纜

將之京示別同學諸子

離別雖可悲傷悲亦有因男兒恃意氣高舉奮薄身時  
哉或我與立據要路津綱腸謝齷齪驤首忘苦辛帳飲  
東郊外百里瞻行塵賓朋遠相送一叙平生親會當別  
斯須茗茗若參辰裘裒豈無意恐令氣不振誰贈繞朝  
策看予朝玉晨

少年輕遠遊祇令識者鄙寸心懷區區安知所言哆風

霜行路難煩言噴子耳未嘗違戶庭何欲眇千里磊落  
四方志生小祝弧矢不奮鉛刀用終引匏瓜耻脰脰晞  
長雲 皇都一何綺竭志放情願衢路從此始龍蠖異  
所抱公等自掃軌

舟中別許聖裁

判袂鄉關上客船含情且復暫畱連山川爲我廣聞見  
鞭策憑誰較後先折柳故人來幾輩把杯深夜想當年  
夕陽樓下匆匆影舊路遙看子獨旋

溪行雜占

三分橋北筇徐收影落青篷曲折流一帶人家小平遠  
春山春樹滿船頭

連波碧草黯離寬。遠道纔過新市村。欲就含山訴憔悴。  
水烟濛濛。又黃昏。

鞋樣船兒畫彩新。玉篙撐去採蘋人。別灣窈窕通何處。  
淥水桃花。灩灩春。

落梅風峭瘦春枝。竟夕濃愁鬢欲絲。想得朱樓寒不到。  
倚闌猶弄玉參差。

虎叩

山塘之下紅畫船。山塘之上羅管弦。春池大鑿闕倩影。  
石壤高張排野筵。玉鳬扁諸亦安在。青驄油壁徒紛然。  
旅人坐嘯脫佩劍。蒼茫虎氣猶騰天。

無錫

繞郭春流滿征橈去不停參差晉陵樹岩巒惠山亭  
步添沙出糟床接路聽緬懷泉上客盥洒足罍餅

京口待渡登岸眺揚子江

生小跼步循書龕書林寢食如銀蟬每念江山最勝處  
輒思一飽酬婪酣揚州巨浸環江三上游控勢雄東南  
鄉臯溯游一水地遠遊興始今年耽首途喜得夙願副  
塵眼一豁心俱甘盈空浩氣自泓涵遙亘匹練奔吳驂  
江豚匿影風不歇掀波拍岸愁崩坍瞥眼倒拔青瑤簪  
水心巖豎爭消泮撐扶菌質下無地不識天匠奚雕鑿  
沉鐵萬古蛟龍潭險惡水性誰能諳運渦噴沫雨倒灑  
半巖花雨交氍毹溟濛遠目恣所貪直欲乘蹻窮瓊儋

垂雲健翼微如鷁，擎珠伏影蠕如蠶。日浴如萍樹如薺，  
葭蒲如髮披鬢鬢。徐沿詰曲行，趁趲反景安得長。戈鐔  
層陰萬里雲交曇，山光水色齊吞含。餘興未洽心轉愁，  
孤瞻張眼遙峯探。豁若寶鏡開重函，照徹下上明烟嵐。  
倒天作底沉蔚藍，漁商寂靜無咕喃。吸精水物羣朝參，  
瓊蟀鬪光頰。蟹躍浮游神，蜈蚣舒洪蚶。更多不識心懷慙，  
擬將誦詭詢僑鄰。攬身登舟夜將半，舟子具酒輸瓶甌。  
快觀聊助深杯談，小言獨自誇詹詹。胸羅溟渤此際事，  
倚歌屬和何人堪。

儀真

瓜浦春潮落，連舫繫水隈。沙邊鼓小市，樹頂矗高桅。快

雨波神過癡雲颺母來長年江口望只許石帆開

紗帽洲守風

明朝準擬跨鞍征作客真難早計程

舟人以預量程期爲戒

多得江

村一日住安知不是石尤情

浦子市舍舟騎行晚過烏衣鎮作

驢券書三紙駝山記首程

自浦子市十里爲駱駝嶺

風塵拚飽歷羈勒

就孤征土銼人烟少旃裘客隊并終朝逢亥市石滑更難行

次滁州瑯琊山下

春空四無雲日出盡遠勢望望瑯琊山馬首滴濃翠垂鞭度荒城望中境已至迢迢往路長爲佳且少憩羣峯



展列屏。一水落寒穗。幽禽叫相應。雜花開無次。風流憶  
賢守。闢地饒清致。名亭路尚紆。未遂探古志。刻竹記興  
懷。吾將預同醉。郗掃編政和中唐恪守滁亦作亭山間名曰同醉

上磨盤嶺

侵曉清流關。望此等培塿。竭來山程行。自午直至西盤。  
旋石轍深九折。到谷口舊語徵大槍。易名固非偶。貝清江集作大  
槍嶺。饑馬疲不前。跼跼凍蟻走。山靈轉詫人。石狀呈怪醜。  
坦懷無崎嶇。壯志尚抖擻。搖曳眼中青。風帘喚沽酒。

臨淮

桐栢水湯湯。奔趨到鳳陽。逍遙容隱吏。草昧起真王。今  
古一夢境。江淮百戰場。持鞍當落日。寂寞渡浮梁。

徐州

漠漠平原舊楚郊  
高卑形勢鬱盤坳  
羣峯北去荆塗接  
濁浪東來汴泗交  
千古憤王畱  
血食五更霸氣出  
林梢  
太平時不忘爭戰  
月落嚴樓戍鼓敲

曉發滕縣

匆匆旅宿先鴉起  
敲鞭直走二十里  
數望東光不肯明  
殘月殘星墮遙水  
馬頭續夢夢思淺  
戍壁畫人驚睡眼  
槐梢列道見模糊  
名蹟愁從暗中遣  
有木勝題滕文公行井田處  
長風浩  
浩烟漫漫平沙遠  
草征蹄寬郊圻曠  
闊有如此分田畫  
井夫何難

楊柳

飼馬摘垂楊。垂楊古道旁。枝枝清露滴。葉葉春風香。遊子意何爲。流鶯語更長。濃陰遮我眼。無處望江鄉。

恩縣四女祠

是否嬋娟屬宋家

田山薑云唐之宋廷芬女

綠槐枯盡叫慈鴉。蓬蓬十

丈騾灰裏。枳落猶開姊妹花。

趙北口

燕陲不可識。一片水迢迢。事去悲歌在。時和景物饒。波心閑白舫。柳色麗紅橋。信美皆如此。誰嫌北夢遙。

盧溝橋

泅泅桑乾水。別派流黃盧。長橋亘單跨。老柳欹半刳。瞻姿媚曉景。表勝明昌初。我來不及時。惆悵日西晡。芳踪

憶元代雅集詩傳蒲

河平元有苻氏雅集亭見蒲道元詩

酒亭或未圯庶慰行客

孤興懷林外望礪礪盈蒿塗不信鬧熱場風景亦已殊  
揮鞭且勿愁咫尺 皇城隅脫驂養筋骨卧遊堪自悞

餅中芍藥和俞槐谷舍人

長安三月不見春春風處處吹香塵倏忽已傳花事了  
卻畱婪尾償鮮新豐臺地僻南門外土人種花如種菜  
連畦接畛望無邊繹繡真成萬花會城中花市擁價高  
花前錯落金錯刀朝開暮翦不得惜日移萬本隨擔挑  
我方欲作豐臺賞俗事蹉跎廢幽往賣花聲過市梢來  
有腳陽春如就訪膽瓶買得定州瓷活水新添插數枝  
深紅淺白巧相間石屏竹几橫參差良書獨擁簾晝垂

花氣濛濛撲面吹微參鼻觀可終日穿櫺不許狂蜂窺  
昔聞花性隨風土廣陵名重三家譜如何冀北花更繁  
翻令江南不足數燈前相對倍關情同自江南達畿輔  
玉堂堦下好追尋莫忘此日衡門侶

暑月買冰偶成斷句

舌本回甘漱玉津北窗清絕散炎塵何當買取盈千擔  
徧給長安內熱人

方鏡和杭堇浦編修韵

揚子新傳百鍊方裁量月魄剪星芒別開生面矜標格  
羞逐時趨掠景光雪冷元珪畱素曜波含文玉折回塘  
範形端楷誠心鑑不用書銘座右張

從來應物譽無方  
圭角稜稜露寶芒  
巧截寒機攢鳳采  
明齊止水侍龍光

上用賈島方鏡詩  
下用江總方鏡銘

玉田常映三秋月  
雲葉

難遮半畝塘  
到處方頭容  
未得晨窗拂拭試窺張

古篆雙文揣尚方  
耑旁矩折走寒芒  
撫成大地縱橫體  
鑿透青天咫尺光  
判色遠勝棋子局  
顧名全合鑑湖塘  
背龍漫作回盤勢  
鱗甲看猶片片張

南金價重立身方  
俗客相看背負芒  
素號辟邪緣守正  
獨持真鑒肯和光  
雲屏對拱雙排座  
菱沼新開四築塘  
徑寸靈犀吾不昧  
清宵常並玉臺張

誰學員通笑大方  
開奩相對轉芒芒  
崢嶸頭角增殊相  
整肅衣冠任葆光  
江鯉剖時疑得簡  
山鷄舞處誤窺塘

韞祿細紘精逾鵠紛懸霄佩影湘川乍舒睂結迷下蔡  
明陽落檻照的皪微風入簾巖醺醺高陽舊侶各稱傳  
暮情遙結憐春靄青鞋不速幾人來落落遽成真率會  
我聞有此高興發振衣起舞聲絳縹御街東西步可  
到健足不假鸞鈴鐵排闥入座主不麾舉琰對花時未  
艾熱酒澆腸露角芒穠春到眼除肺昧諸公名價倍龍  
門環顧獨我沈涓濬尊前共泯流俗見胡肯局迹自駟  
僧長揮連袖激清風競騁雄談瀉驚瀨徵評或出半嘲  
諷寵賞不辭三沃盥掀冠露頂醉雜沓抽筵匝樹行賴  
踰大戶漫逞長鯨吸矮紙尚檢精金汰頗念家園風景  
稠數里何曾斷絺繪篙師直賤青油船鼎娥技妙銀絲

龔朝朝挈榼問湖濬處處連裾覓酒旆一自擔囊走京  
雒堀堞風多散埃壘煩思蛸集難翦排隙光駒過卽聊  
賴蒙頭踏壁耽睡眠坐此但速成老大快君鱗翼得攀  
從顧茲膏馥猶沾丐愁顏一共花解睂春來僅數斯遊  
最人生遇合古所難况逢麗澤各和兌花下當成秉燭  
遊主人有酒幸多賚臨風惆悵正無言花氣閨閨參鼻  
齋

送二弟南歸

去年三月並轡來燕都我畱西壁爾東隅望衡對宇尚  
嫌闊翻然襆被來從予寒宵爭戀短檠燄醉或欹枕狂  
謠呼此身渾忘在異地骨月未肯違斯須今年忽又直



三月柳綿漠漠吹官衢我如蠶繭自裹縛側身南望長  
嗟吁輸爾奮翼先南圖鞭絲塵鞅揮珊瑚歸情別況殊  
飴茶眼中卻笑同來吾歸飛不得仍相俱攀條送別東  
道主人事胡爲身自作客猶區區

歲甲寅天台齊次風翰林讀書之室生竹一莖  
兩岐枝枝相對節節相當是年堂上兩尊人六  
十齊壽而翰林適應大科之徵山陰胡穉威倡  
爲祥竹詩屬予和韻

扶筓兩兩疊成雲接葉交枝翠尾分抱節豈因誇獨立  
駢頭原是愛同羣山中顯秩饒千戶林下清風並五君  
向曉碧簾高卷處鈿竿相賽綠霜文

欣覩珍條萬口喧林於千个繞曹源

曹源講舍翰  
林讀書所

管和嶰

谷真仙籟葉醞宜城稱壽尊練實已成交舞鳳錦棚又  
脫漸盈孫葛陂湯羨雌雄化昨夜春雷起舊根

仗引階前擁蓋深鳳梢簇簇綴華簪凌空不讓千條玉  
列貢曾偕三品金露潤粉香晴染手雨添風葉夜畱禽  
嬋娟久憶東南美日暮天寒倚翠襟

虛心自晦簪簞質震出俄驚十倍才詞賦祇今稱兔苑  
招延從此築金臺故園不乏平安報僻徑都隨嘯咏開  
她祖年年扶老望一枝卻稱倚雲栽

題阮生畫蘆雁

幽棲曾寄曲江頭水閣三間俯釣洲一帶蘆花幾羣雁

年年詩思不禁秋

畫本從翻牡蠣窻  
襍毛羽散秋江就中合有閒身共  
獨速青蓑倚釣艫

載雪低叢一丈深  
圓沙拍拍赴幽尋  
水鄉風物江南景  
縱極蒼涼也繫心

重陽前六日葉書山庶常俞爾謙舍人金以寧  
典簿盧賓王比部吳鄭公庶常姚舜馨孝廉金  
質夫庶常姚南青孝廉申及甫徵士王弢山舍  
人湯莘來吏部王璞完進士錢相人編修家峙  
文叔曉江兄燕集陶然亭

來經多寶地靜較退思品秋色他鄉早清遊我輩杕軟

塵宜蠟屐薄冷換蕉衫。敝屋軒窗淨遺碑歲月剗合并  
酬晦雨嗜好共酸醎占席陶兼謝趨林簪附咸雅歌猶  
次第苛禮盡夷芟薄費錢挑杖淳風木作槭囊萸循故  
事煮茗解清饒稻蟹輸匡膩霜橙記手摻梵林容暫放  
觴政許誰監撫檻青連目題垣白勝瑊遙峯沉沉瀼廣  
陌被穰穆雁影書開畫泉光鏡脫甬碕蘆人盡沒山果  
鳥爭鵲滅響聞魚鼓移陰入檜杉南雲窮壙垠西嶺隔  
嶄巖節序方催老登臨更觸凡昔遊餘破帽生計舍長  
鑱障壻徒揮扇揚濤未挂帆菊英持晚艷兔穎脫秋毫  
魚噉羞同隊鷗盟喜至誠當筵猶別恨策馬又驚颿時湯  
吏部王進士家川陸三千杳音書一尺緘此身真梗泛後會

孝廉將次歸里

想車轍偃仰思無極蹉跎髣髴尚狂吟各沉醉歡語詎  
詰謫遠岫昏鴉接疎林落照銜寒花分採摘歸騎競鞍  
鞅雅會誰相繼龍山一壁巉

### 羣鴉行

江南惡鴉江北否得以安爾室家給爾口索飽常分野  
鶴糧就煖亦隨陽雁首我居僦近城南偏秋冬之際聽  
爾去復還朝來體嬾尚堅卧飛過但覺耳畔鳴風泉日  
暮仍然接歸翼仰面貪看數不得漫天歷亂幾千羣約  
畧每羣盈萬億低勢還疑暝雲墮頓使軒窗遮一黑我  
聞石首秋化鳬蓋埜輒同暴雨驅又聞關西突厥雀連  
羣結隊徧沙漠由來百物各成類居則連巢出連翅保

聚團樂族轉繁同林義在不輕棄嗚呼我生豈無麋鹿  
儔天涯地角兩處徒悠悠

和鄭筠谷侍讀咏綿簾石炭

祇恐驚風入難嫌皓月遮密同花戶設

蒨敷詞話京師冬月既以紙糊窗格用琉璃畫

片嵌之此毆陽楚公詞所云花戶油窗也

寒使妓衣加銀蒜何增重香塵不受斜

雙釘垂鎮日閒煞玉鴉叉

碎鑿房山骨家家抵麝桐出爐銅銓熱和水粃盆紅戒

漫筆石炭俗稱水和炭

耐久殊茅草消寒黜馬通齋堂畫眉石爭及

劑時功

宛平齋堂村出畫眉石見明一統志

金約甫以寶坻銀魚見餉

蛤山山下波銀色密網牽來二寸魚徧體瑩冰睛點漆

江鄉風物憶王餘

故人珍重餉嘉肴  
入手親開綠箸包  
糝附油蒸殊鹵芥  
食經湯法試南庖

無不宜齋未定藁

卷二

仁和翟灝晴江

馬思山員外示以西山紀遊詩因憶去年亦曾有約未踐卽用其酬桑水部韻

蕭居賃城隅開窗接林壑咫尺願有違羨彼僧伽託折簡已成虛賸此興旁薄誰歟三日遊先我一鞭著篆路繞香尋雲峰振衣作清響落天來一一嘹風鶴了經指掌傳坐惜攜琴約掩卷復西笑孤懷詣碧落

花窖歌

司花天女帝所差二十四信相推排甲乙次同蕊榜定篆名一一懸瓊牌產性更聞異南北不獨櫟橘難踰淮



何來花匠弄狡獪忍使正氣翻成乖漕艘偷裝驛競遞  
五方雜卉分移皆頑冬天氣地坼裂脆質定擬成枯芟  
伊人養花巧方法獨闢煖地營茅齋鑿坎或深四五尺  
周遭瑾塞枯禾稽入室乃類馬遷閉荷鋪復抵劉伶埋  
微難蘊火續晝夜頓覺氣候殊陰霾上已以前上元後  
一時攜出長安街丁香解睂桃頰面行分十二羅金釵  
誰欺得效蘓屬國強逼不受心如錯品高聊任傲霜質  
幻飾未肯隨優俳凡秋花皆不能烘上二語借用蘓建傳鑿地置火事其餘晚艷各爭吐  
紛然竄入春風儕俗眼但知希物貴饒涎往往濡同蝸  
纏腰不惜破萬貫壓軸尙擬裝連輦我生亦有判花癖  
對此且復雙眼揩枝枝廉察費矯枉人巧孰與天工偕

精神發越已頓盡火氣中入傷形骸正如娉婷惜早嫁  
瓜期未及紅粉娃又如鞭箠施急迫一逸乃斃犁耜騮  
花靈丁此亦太苦豈屬有意矜顏佳都家少年強解事  
深紅淺白交編挨愛玩祇得目前好經年委棄同茅柴  
唐宮昔有催花術獨擊羯鼓停繁哇頃刻幻開殷七七  
杜鵑花敵西風颿神竒特擅千古話煉彩手欲追皇媧  
胡爲後世昧師法勉強不使花情諧官園種菜或覆廡  
惟漢早已生厲階卓識猶傳名少府不時者黜垂模楷  
帝京春事況不寂百花陀立雙晴厓

日下舊聞百花陀雙厓  
一淵上下皆花村人多

有不知  
其名者

豐臺芍藥簇繡譜玉河楊柳垂青緒到眼俱呈自

然趣次第足趁櫻毛鞋陽春所名烟景闊取之無禁探

無涯得意不在馬蹄疾行歌日日春盈懷

喜晴

被池夜釋厭厭氣簾額朝通靄靄光縱使少花兼少酒  
難將天色視尋常

送家兄歸里

落日照金臺倦客有嘆聲昔年兩嫖戀足不違戶庭中  
間一杯酒隔斷三千程三千我尙從骨月他鄉并傷彼  
水中梗本是同根生離踪忽復聚蓄念聊與傾碌碌竟  
何得黃塵滿衣纓迹殊莊舄顯懷土亦同情悠悠歸路  
長蕭蕭征馬鳴去住轉相易我意其難寧

相送出郭門仰望白雲表思我堂上人轉顧成衰老操

持重家督况廼羣季小白髮躬煩勞疇爲伺昏曉江南  
走馮歸決計已非早輕風吹柳條依依接官道雁刻臨  
當乖我心詎不懽且忍別離苦念此腆養好君子審所  
重牽衣亦徒擾

移榻

本是鴻畱爪還同燕定巢明窗開牡蠣空壁竄蟪蛄金  
盡探初覺書殘檢欲拋更須愁屋漏新把幾重茅  
炕寢殊風俗吾獮任所宜掃塵除鬪蟻補足易支龜坐  
卧今宵穩琴尊到處隨東西頭老屋不費草堂貲  
兩年踏壁卧偏爾最相親穿處頻當膝移來宛避人清  
仍懸紙帳軟但欠花茵客至多縫掖梁空不厭貧

無入生...  
位置粗相稱翻教怨莫堪寄居常附蛄眠思欲過蠶聽  
兩人初散攤書子未諳卧遊如可學乘夢到江南

### 落葉

蕭條景物綠初稀露盡江邨白板扉遠水亂捎舟影小

寒山欲上路痕微酒情自檢從今病

醉鄉記飲流謂  
睡者爲病葉

旅夢難

隨到處飛底事長安瘦署客閒嗟苦愛不知歸

流光一絕鎮相憐

傅元詩落葉隨風  
摧一絕如流光

菸菑隨消樹樹烟庭院

陰濃纔往日心情搖落又經年登山遠客逢寒雁過雨

空林歇暮蟬莫便臨風奏高曲蕭蕭黃影正無邊

斷角清砧一樣愁烟霏水潦自成秋停車客坐風吹鬢

沾酒人來月在頭顧影可憐同瘦質漫空又捲入高樓

故園尚有凌寒竹記得芳尊綠葉浮

歸程南指路迢迢衰鬢偏驚亂影飄

歸人值落葉落葉驚鬢皆唐人句

桃葉

渡頭人不見洞庭湖上水難消蕭閒古寺停秋磬寥落  
長坡唱晚樵踪跡幾年行未到清霜白過舊溪橋

幾飄驢背落銅街纔入秋時便愴懷苦憶鶯聲成往事  
暫依蓬梗去天涯蝶黃可更來千隊苔綠無端共一階  
解事平頭勤拾取粗供茶竈餉蕭齋

曲寫哀蟬韻玉琴霏霏黃雨自盈林夢雲老鶴移巢徧  
入草涼蛩覆綠深梧井露殘迷曉跡楓江水冷助秋吟  
朝朝碧幃愁吾眼一望鄉關快此臨

裊裊蟲絲罥帽斜廚烟青翠護山家何人更解吟枯樹

昔日曾來送落花小閣似聽經夜雨寒林宜帶數行鴉  
倪迂畫筆真蕭澹好向西風駐短車

已見梧桐一擲驚白楊今又嘆蕪城閉門卧後階難掃  
散社歸來屐有聲野岸無人秋水闊天街到處夕陽明  
江南黃葉村猶在不獨蓴鱸繫遠情

鄭筠谷侍讀足疾假歸詩以送之

先生大經儒請得質經旨如何天之衢忽乃良其趾視  
履已考祥鼎顛實無否豈惟歸妹占征吉跛能履天山  
慕嘉遯此意吾粗揣咸拇利安居艮腓重時止初九不

出戶久試甘節美

鄭自夏初病足杜門者已數月

係遯終疾憊執遂黃牛抵

嚮晦入宴息隨時大君子譬彼成功退成終并成始巽

伏且南方足蹇利在是无妄藥何爲損疾遄有喜蹇往  
而譽來大亨養仍以似此見幾作神明但存已不待形  
下索紛若用巫史身安德愈崇寧計睽象倚吾蒙更誰  
求歎惜羝羊比

咏花糖三首和汪西顥徵士

小摘方憐嫩蕊殘忍將零艷委霜寒回春賴有團花印  
範出依然朵朵看

釧聲搖戛夜窻春慎取花羹上蠟封採得百花甜口腹  
細腰人亦等游蜂

充糒瑤蕊屑層城餐菊猶聞碎落英略遣投甘從世尙  
不教況味太孤清



集杭堇浦新居分咏金瀾酒

玉爲膏珠爲汁不抵金漿滿壺挹三人莫欠明月邀一  
川須作長鯨吸先朝法酒賢聖稱銀餅賜出雙龍升封  
開黃紙香散席洞庭波溢琉璃澄此美百年能幾遇麴  
生懶向青州住灑海杯乾滄變速吸江口在潮來暮擁  
絮開爐今夕偶寒燈照殘不辭手醉倒膏騰百不知金  
運消亡說何有周麟之海陵集云金瀾者金運其將闕也明朝酒復仗君沽澆書  
不定金瀾需但視門闌喜氣殊尙得雨露傳 官壺

次韻金質夫過飲

得馬亡羊事莫關且從杯底借紅顏客憲祇仗友生樂  
塵海尙餘吾輩閒喜誌燈花垂眼纈寒侵人影出肩山

貧厨酒盡言無盡脫略何須狂語刪

湯婆子聯句

湯媪范錫成戴廷熺綸掌利用異鼎鑊質符坤永貞汪  
沆西顥名婉巽初索皤然腹彭亨金文淳質夫宛爾肩  
戍削竅上犀口緘晴江砥下夔足斫旁無獸環垂綸掌  
頂有螺髻著混沌失睂蛾西顥允澤謝面藥居下適陰  
義質夫爲燠協時若外礪金性堅晴江內涵水德弱朔  
氣戒頑冬綸掌霜信入重幕獨客寡所依西顥單棲每  
不樂悽劇號寒蟲質夫凍憐警露鶴宵長鷺足拳晴江  
夢短蝶羽却駮疥忽到踵綸掌齧戾漸如斲朴握煖莫  
邀西顥辟邪香易鑠愛茲廓能容質夫昵汝重可託飲

以百沸泉晴江裹以千絲橐熨體同衾稠綸掌橫陳附  
履屨相傍何蘊隆西顥相偎免焦灼微陽欲透繭質夫  
奇溫匪隔膜美睡勝蒙頭晴江沉酣抵軟脚婦姑戡勃  
谿綸掌法喜伴恬漠客遠昵枕嫌西顥兒防踏被惡轉  
側便醉鄉質夫挹注授僮約老忘燕玉需晴江遠任驪  
泉涸溫柔縱難兼綸掌貞靜已能畧鉛淚制不流西顥  
金銘擬無忤欹傾伏本盈質夫缺窳慮在薄紈扇遭棄  
捐晴江竹奴悲冷落策勲薦牀牀綸掌怙寵戒莫莫三  
沐三鼎纔西顥一詠一觴各蟄戶快合并質夫炙硯供  
笑噓聯吟繼前修晴江涪翁斐然作綸掌

家書至述杭兒近狀寄內四首

別尙呱呱泣踉蹌又越門食牛餘猛氣跨竈得傳言好  
譽成予癖能慈仗爾恩養兒同養術所貴葆真元

怎降黃犢健欄楯費周遮梨栗搜當與之無識便嘉聰

明觀踣跳歡喜任呻吟但爾支持久誰憐病體加

時內子病

艱難逢一索愛視掌中珠斷乳休辭媪祈星莫信巫性  
情防是縱衣食檢寧羸更問明年狀村師可就無

人意何從慰徒教屢過庭膝虛愧懷祖面垢想添丁見  
尙疑生客歸須換弱齡燈前尙閒話爲說我容形

寒夜與吳中林通守沈曉叔編修查蓮坡孝廉

汪西顥徵士陳江皋上舍陸賓之庶常集杭堇

浦無畏室通守首作禪語分韻繼之

落落海上漚同此大覺憑愛憂生輾轉身毛常豎騰盍  
飲般若湯作戲隨場登毗耶老居士精室完樞繩經冬  
結詩制慶膺牽吟朋大家團樂頭半座喜暫升律寬香  
火社事淡雲水僧醍醐酒同卮禪悅飽不勝我來投坐  
具戀此三宿曾窺牀貝遮眼擁衲涕垂膺想覓句呈佛  
罔顧口毒興宗雷大禪將先顯智力能清詞傳雪竇妙  
響聞迦陵吁嗟達摩規文字非所矜宗彼廣長舌綺語  
要痛懲轉慮百想斷頑空亦下乘法華自有豔義海寧  
徒澄倘假鈍根斬猶看慧業增低頭撥深火公案翻層  
層一笑窻月白早懸無盡燈

上元後二日飲金以寧伯仲所分賦

珍重趨君約齋頭禮數寬  
愛談忘夜警得酒傲春寒  
白月待歸路清時閒內官  
餘杯慙小戶畱取隔朝歡

明贈光祿少卿陳睢兵廵道隴西關嶽華先生

忠蹟詩

并序

先生諱永傑字人孟流賊犯陳睢屢戰告捷賊慕其  
英武希招致之先生叱斬其使賊憤甚糾壯騎環攻  
持九晝夜糧竭兵憊及于難明崇禎壬午三月十二  
日事也疏陳卹贈國朝爲之建祠

思陵末造乾鼎沸狼烟鬼火接封燼米脂眇賊黃巾魁  
西擾三秦南逼魏紛紛軒冕狐兔羣薶伏不假合圍費  
先生壯繆之子孫平時高節百鬼畏誓伸隻手挽銀河

寢不解甲食忘味烝土已曾堅戍堠殺妾尙將足軍餽  
洵然狂寇被摧磨憊矣殘兵勤撫慰甘言無忌敢曉曉  
陡看背裂鬚礫蝟博人窮獸利牙爪蔽空孽豸蒸蝗蜚  
匡城血戰九宵連羽鏑交馳動精緯庚癸無靈丙丁熾  
妖墓勢逞月蝕旣常山舌在厲聲高熱血當原瀝肝胃  
生無能報死當償却敵鬼雄魂魄毅此言昔覩昌黎文  
紙上于今見生氣張巡饗士許罵賊睢陽今古事髣髴  
騎星天上共頡頏授職鄴宮欣集彙豐碑傑字表千秋  
絃歌臺側薤榛卉墓在絃歌臺嗚呼人身輕重蓋棺分一死視  
君九鼎貴

李宸妃粧臺

獨有粧臺在同時故物稀巋然如魯殿遺事說金妃逝  
水成今古閒花綰是非已沉臺畔月曾否日邊依

一月日邊明妃

對金章  
宗句

以龍井茶分餉吳東壁杭堇浦媵以詩

蟄雷響空山萬卉謝采劄獨有玉茗芽微芒透勾甲娃  
鬟纖指爪聽鼓共晨掐貢新首方物千里輕一雲南山  
舊禪侶念客久渴乏遠餉京洛道窮裹幾重夾急欲付  
寒鐙點試魚眼眨添薪仰松椽遞水倣茗雪料理三日  
忙兔璣始一呷清風習習生何用把蒲筵微熏中倦體  
攤牀自餉貽夢魂轉顛倒宛聞空腹喋曰昔共鄉里與  
君素馴狎屢邀青州居未嫌鬲上陜如何三載瞥十斛



塵堆壓不聞種菜園踏破本羊胛非類并相仇勢成小  
敵怯醒來記斯語失笑捧胸脇轉念吾邦美靈秀毓川  
峽芳木擅聲聞僅叨餘氣洽豈無大雅羣配此清絕業  
二公屈指最道詣出塵刼腹中貯何有琳琅萬編插試  
移茗椀對況味較來恰一匳遂平破親題五雲押詰朝  
遣銀鹿兩手分路扱寶劒贈烈士庶免悲龍匣想捧潞  
公斲不買劉生鋪耶律楚材詩長笑劉伶不識茶胡爲買鋪漫隨車精意驗乳花雅具  
備火筴關門抱膝餘甌影動白恰百脈導津潤春冰釋  
官闌報章如俯投請示滌胃法

過周蘭坡翰林齋出移居詩索和次韻八首

虛舟不繫任西東又僦閒坊等寓公白犬丹雞隨杖後

殘書禿管簸車中天閑已繼追風驃小泊還成踏雪鴻  
集向上林爭選樹較來難獲一枝同

淨闢階蕪掃席塵空堂蕭瑟忽成春寫圖絕異村夫子  
鑿室豈如農丈人賀獻上尊從事酒來參末座客卿賓  
琴書几杖都隨分瀟灑還供見在身

青雲蹤跡分無乖易地相宜得願皆

舊居讓齊次風翰林

比向吾廬

真倍勝添將話柄亦殊佳兩邊共祭陰侯竈三次曾更

杜老齋

寓已徙

他日

詔攜家具入省中同對藥翻階

向陽百卉曙先暎半畝林塘長舊蓀書帶尙看遺夙種

其新居曾爲鄭筠谷先生居

草窻應不翦青痕地靈祇被英賢占室陋唯

因道德尊越水更知堂構古遠傳經業付仍昆

無不宜應

轂鯨車驅四路交一時齊卷衲僧包

時鄭筠谷阮裴園陳句山金以寧質夫俱有移

居之

三春柳煖鷺遷谷百尺桐修鳳定巢嘉樹因緣明

府乞新詩唱和小胥鈔但憐問字人難識一一憑誰指

市梢

宣武城南喜並居官行振羽白春勑清陰駱驛瞻衡宇  
虛禮芟除話爾予地脈宛分同汲井壁光相鑿對翻書  
循墻昕夕抽身便蠻榼招攜門飲儲

薄材無分近巖廊欲往從之道路長瑟縮漸教心就懶  
賤貧安得語生香諸公家是鳴珂里故國春如碎錦坊  
進退恍成籬下觸綠尊青鏡負年芳

隨地風花別溷茵追從未及鏡湖濱到門不散王生髮

把臂猶看孟氏鄰  
薄海交遊嗟我晚  
名山著作擬君倫  
翰林題余郊居圖  
有著作名山業句  
何當買宅輸千萬  
移傍高齋奉後塵

偕汪西顥徵士周心羅明經吳季調金聞石兩  
上舍至太學觀石鼓

石刻三代遺  
獨數岐陽鼓  
歐陽永叔始三疑  
聚訟紛紛  
費覲縷羸秦  
宇文兩說最無稽  
其餘尙足資採取  
有若董卣程大昌  
引據盲史歸成王  
王歸自奄蒐岐陽  
此說未得爲荒唐  
後人過信韓蘓二  
公說往往摒棄此  
一切千秋誰具隻  
眼人安得驟將疑  
獄決小長蘆釣師  
搜括舊聞靡缺遺  
金甌玉屑悉完聚  
足令十鼓增光儀  
余來日下三年茲  
未得一覩法物心  
鬱伊手此一卷卧  
勿離

參同較異覓正本丐貸不吝酒百瓶偶從吳君得口授  
讀自秘府無人窺遺珠收拾二十有餘題所聞所見皆

異辭

吳東壁先生於三禮館閱永樂大典所載石鼓事蹟有目下舊聞未收錄者二十餘條余益他書所見爲石鼓補錄一卷

亟呼小胥

膽手橐研就丹黃夜親校搬薑積米旋倍之將以屏當  
刷梨棗更思廣輯諸家音釋文發凡起例如班表今日  
幸從諸公後摩挲不負此兩手吾欲拓之歸鈎摹完字  
列表首癡生好事固爾然邟慮世間先有珊瑚鐵網珍  
珠船

偕蔡雪鴻處士出沙河門爲友人覓其先觀

徑仄停車遠彎多請路頻風聲啼怪鳥樹影立長人瞰  
穴狐羣竄尋碑字跡湮若敖差免餒吾敢憚艱辛

出西直門小憩高粱河畔

出郭不數武喧寂頓殊隔清冬亦近尋不待冶春展齊  
園蹟已荒一川快實獲葭收水徑寬清楚劃梁石凭闌  
俯藍浪高柳影如戟條魚識早寒攢沙每什佰徵詩証  
孔昭平鏡湛空碧茲河乏上源諺語想曩昔見水經注原土  
雜沮洳隱散玉泉脉沾流欲深討款段復前策

自廣通寺取道過門頭村

精藍占崇基架構煥且儼丹門俯大道佳境入已漸風  
葉落滿頭作態尙磨颭林空渺棲匿突出烟幾點大小  
同肩排好醜各着歛黏空雲氣微碧色妙渲染昏疲兩  
破忘筋力殉所慊平生慕隩區得路正西崦門頭第幾

村載筆先點檢

門頭村爲西山門徑裏宏道有先問門頭第幾村句

閉戶養腰腳再來踰

絕險

欲至海淀訪周元木不果

出山仍住山君與山有素嘆我塵土人不識山前路

小隱園燈詞爲杭堇浦賦

雅意從來得未曾元宵佳話此新增綵棚繡幄全無用  
一樹梅花一盞燈

清詞同鬪調頻翻關住春光獨滿園多事酒旗歌板地  
魚龍曼衍苦喧煩

水池倒影薄銀紗槭樹無春也著花頗笑月娥佳思短  
鯨膏未盡影先斜

酒缸映動吠琉璃街鼓擊擊醉不辭髣髴家園舊風景  
沙河塘上夜歸時

冰糖聯句

勁質出蔗田汪沈西顥取象覩凝冽迢迢閩海造柯一  
騰南墀津津頤堂說初擬醅牀壓晴江漸作鹵盤結纖  
刀刮白沙許峻標聖裁重羅篩素屑惟渙授以萃西顥  
含貞發其烈峻嶒鬱寒塊南墀廉厲守甘節或大若拳  
鉤晴江或銳如角凸或同鬼斧斲聖裁或抵鰲肪截勻  
或散擣蒲西顥碎或零秣幽光艷明璃南墀剛影劃  
精鐵凝岷池醴泉晴江配陳山甜雪凌堪千歲藏聖裁  
凍豈六月輟熱中陰火潛西顥和懷冬柄竊完堅出素



無才生  
坊南墀致遠絡黃篋共逐飴簫賣晴江遠勝蜜脾切雕  
盤雜羅飢聖裁髻兒恣攫掇饒同饑鹿舐西顥粲效寒  
鼠齧爽嚙過梨頭南墀微含等鷄舌釋口見澌流晴江  
磕齒愁展折惺忪曉霜踐聖裁胳膊春池裂辨字齟頻  
抵西顥嘗欖味徐咽乾唇轉渴煩南墀病肺漸疏泄煮  
石訝同功晴江餐玉妙齊訣法惟貞觀始聖裁貢乃揭  
陀列煎霜術已奇西顥熬冰意尤別窮工創新美南墀  
聚物養饗餐盍簪飴有戒晴江呵硯凍方埒鏤刻無用  
辭聖裁願補誠齋缺西顥

蘆草園查氏別業聽雨偕汪西顥作

拖泥閒就白扉敲應免詞人舊雨嘲竹屋儼如舟底坐

瓶笙轉向耳邊交征衣暫得消蓬塊故蹟還疑響荻梢

今園已無蘆

商略新詩愁未穩農謳先已遍春郊

春闈榜後偶作八言十韻柬姚舜馨毛睿中

君不用頻擊玉唾壺亦不用改調齊門竽但得與君鬪  
十日飲同作高陽市上酒徒拔盡抑塞磊落志氣闢開  
豐麗博敞軌塗人生失意事常八九買臣主父偃亦饑  
驅終能以功名取富貴豈竟沒沒作栖山夫芙蓉振秀  
在秋江上安得與桃李爭榮枯莊生謂鵬以六月息仍  
奮九萬里而南圖天生材豈置無用地特不欲輕出其  
魁殊器固以晚成爲可貴不見豫章之與蒲盧予未拾  
一芥且作達君何爲是栖栖者乎

李陽冰仙都篆石歌

并序

仙都獨峰相傳軒轅氏上昇處唐李監令縉雲時篆  
黃帝祠宇四大字樹之碑祠毀碑失久矣茗溪鄭冠  
三爲學博得之叢棘中徙貯黌宮作詩以美之

古來神物多中晦精英蓄秘如有待岫嶁碑埋還自出  
陳倉鼓散久仍會真人詎肯炫珍奇健者初能抉幽闕  
陽冰篆室抵頡籀筆虎鴻聲駕斯蔡不逞俗書換白鷺  
相傳遺跡等金薤仙都山拱雲霄出軒轅氏畱祠宇在  
攀髯莫挽騎龍速走筆尙見蟠螭大塵苔侵蝕幾經秋  
雷霆呵護幸不壞顛末未遺圖經傳款識亦遺碑自載  
空谷何人赴足曾茗溪博士好古最披榛附葛履山腰

剔土爬沙破天械蚪蚪經從家學古

李陽冰家有蚪蚪孝經見趙次公蘄詩注

癸巳

刻看文數配杈枒老樹盤硬枝鬱律長蛟走生態傳摹  
豈惜墨千挺寶重休誇珠百琲繩牽毳毳昇移轉簷深  
礎緻嚴護蓋千秋永作膠牆鎮終朝喜與髦士對君家  
餘慶擅大力昔日鳳翔表佳話

石鼓置孔廟自鄭餘慶始

後先追合古

情深遠近稱傳盛事再鄉邦不至千里隔紙本未得五  
都賣何當隨子躡雲根摩挲一盡平生快

分賦得秋柳送許靜岩孝廉之保陽

一夜吟羌笛淒涼不可聽人情關別酒鴉影接長亭悴  
葉攀都盡征鞍去不停西風轉搖落盼望眼難青

禁體咏雪用東坡聚星堂韵

重雲凍合不分葉。罡風鍊雨暮成雪。霏微數點吹未覺。  
顛倒滿空來不絕。充哇占壤失均竅。累砌加簷隨曲折。  
犬聲吠巷狂亦喜。馬蹟翻泥過旋滅。積團漸重忽并墮。  
斜點欲來仍反掣。紛紛互鬪逞威稜。一一詳看裁細纈。  
潔身方幸我非孤。擇地誰知爾未屑。關門任打竹聲頻。  
登樓怪換山形瞥。方圓無定却齊輝。茵溷胥安不虛說。  
小堂僵卧獨推思。一任夜寒衾似鐵。

曉起雪止再用前韻

夜蟬行沙蠶齧葉。淅淅聲龕駐勻雪。朝來俯仰但一照。  
挾背平原叫曠絕。寒花逞姣態。橫陳穉竹學恭腰。屈折。  
冷壓厨烟濕不起。淨奪山嵐微欲滅。遠人著屐路新斫。

密座垂簾風屢掣但恐斑痕化愁鬢卻愛晴光除醉纈  
半壁猶然聚完塊一林忽自散餘屑冷尋未厭驢背苦  
久滯翻憐鴻爪瞥收藏試遣家童掃占驗頗聞鄰老說  
十斛憑將澡毒塵歸向春田理耕鐵

鞏華城

駐蹕先朝事蒼涼見暮城殘陽棲仄影冷雁截虛聲路  
轉河流合林疎客眼明流連多古思下馬且停征

炙研

酸吟蟄冬房風罅透餘冽山骨本寒凜斲破氣猶桀鱗  
鱗霰影攢庚庚龜紋裂皸手已籤排宣鋒亦椎結才乏  
元康敏宵諷耻中輟官租與束薪舊意間嘗竊爐頭堆

品字火攻令中熱墨花粲騰騰益氣盜春洩奔筆赴涓  
池淋漓暢點振掀唇勞十嬪轉笑呵穎拙

消寒社分賦得熊白

食蛙愁太瘦聊用進肥黏酒定鶯黃配

東坡詩洗盞酌鶯黃磨刀切熊白

珍

惟象白兼點酥餘手膩割玉趁刀纖一嚮嘗猶分何勞  
問典籤

長至日看象聯句用昌黎陸渾山火韻

緹室葭動夜氣渾王任湖具區大祀遠溯萬物源吳廷  
華東壁閭闔詖蕩雲脚吞戴廷熺綸掌華蓋羽璫金根  
軒杭世駿堇浦園邱燄燄初柴燭金焜以寧訾黃蹠蹠  
彌平原陳兆崙句山五象厖蹙陵厚坤金甃雨叔屹然

嶽立絕鄂垠金文淳質夫樞光星朗勾陳垣周天度心  
羅珠纓寶絡排黃門蔣和寧用安文罽十色輝朝暎陳  
滋長鄉蠻奴下上捷騰猿劉星煒映榆詭體皴駁蹲疥  
龍睛江闊行大步舒翔鷗翟廷法補堂天衢緩駕靜不  
奔張藝東田氣壓百獸形模尊具區吉雲趺坐卑鹿園  
東壁金瓶嵬背萬寶繁綸掌萬目環注萬口喧堇浦山  
移次第儷篴塤以寧招搖連蜺旂旗播旬山垂鼻宛宛  
竿揭禪雨叔陰虹怒決連尻臀質夫黃朱羃羅輿轆軒  
心羅攸飛夾馳紛橐鞬用安香陰砑隱來雲幡長卿豐  
隆駐節靈旂帟映榆射牛虔瘞無歸膳晴江獨爾蠢蠢  
猶陵屯補堂巨迹深隱龍負盆東田鑄形麟困儕犧罇



具區駢闐肉陣高言言東壁睢盱却走入海翻綸掌大  
旨欲挽陽和反莖浦頑皮潤動兩目暖以寧五丁分行  
鞭雲根句山左右傲睨無龍孫兩叔千氣萬力集趾跟  
質夫度支月廩咸 帝恩心羅六牙珂雪墳厥元用安  
峨峨腰脊愁攀援長鄉巴蛇赤螳胡足論映榆闐然直  
入摩高閭晴江蘋壤侈剝撐塘痕補堂元尊般裔虔心  
魂東田靈寢震澹消煩寃具區帝釋調馭威神存東壁  
甘蕉都蔗供噍噉綸掌玉河沒浪從姘婚莖浦萬里底  
貢傳滇昆以寧鉅墀拜舞當關蹲句山莫教狂舞如崩  
騫雨叔肩鑄石室勿復怨質夫圖南肯羨移海鯢心羅  
宸居崇衛依崑崙用安章溝嚴署番朝昏長卿燿火蘊

燎蕭炳焚映榆侍祠歲舉匪數煩晴江雄詞擬鑄宛鼎  
捫補堂

雪中集紅泉館送汪西顥之福州周心羅之淮  
安聯句

朔雪氣莽蒼封徑不可彗穿林見屐痕打門故驚睡杭  
世駿堇浦噤痒到毛髮沾濕在裙帔穆穆如有思卒卒  
何所爲王任湖具區近別不知愁遠別心煩熾執手黯  
不言錄別在取醉汪沆西顥命庖潔羞尊戒客後先至  
清歡期永夕雜坐語無次周天度心羅賡續八能士紛  
綸五經笥蘭蓀抱奇芬韋弦取幽贄周大樞元木卓犖  
無近情俯仰多古意百觚恣喧騰丈室傳清閥趙賢端

人積素照虛襟紛麻雜離思融情發丹府寒氣遠相避  
晴江燭跋請更難尊空尙容市顛倒沒杯杔瑣碎乞鹽  
豉翟廷法補堂南烹洵堪珍異味不難致方言見鄉情  
雅令徵僻事革浦談豪餘可賈理妙近取譬懽悰浩無  
方離懷耿難暨具區感慨恐失時從容起攬轡萬里矜  
壯遊九有竚竑議元木棲埒笑雌伏摩霄學鷹鷂東南  
苦濕腐西北足塵膩端人汗漫隨雲敖荒唐追赤驥飈  
輪駕三山暫出亦游戲晴江薌淪鳳山茶鮮剝楓亭荔  
禽呼習侏僂詩橐續骹骹西顛河魚昨大上哀鴻滿徐  
泗書生藉刀筆袖手徒呀咽心羅不忝管樂才均負公  
輔器借箸無迂圖叩囊有餘智補堂大材用固難小車

去何駛兮令寄當歸未許嘲遠志元木雲霞友誼高金  
石天情摯杜甫笑老狂魏徵真嫵媚具區先路既有道  
前修尙容企致身期潔清舉足懼顛躓莖浦瓠落無所  
容萍跡偶然植枘鑿付方員率挽任軒輊端人旗亭柳  
尙髡驛路草未翠贈君與送君含情兩不遂晴江妍妍  
美風度翩翩盛書記迢迢歷國都累累煩郵置補堂或  
登劉伶臺或蒞無諸治行營漂母墳縱觀估客肆莖浦  
曉烟單舸輕春風片帆利河流盪日光灘聲澈夜寐具  
區遠移一枝巢願孤九州被高會續郾城歸夢結湖寺  
西顥古歡膠漆投雅操熊魚嗜良言互丁寧隱抱各宣  
示心羅身世號寒蟲歲月過隙駒昔爲同隊魚今作分

飛翹端人輪蹄忽齊發燕楚各遙寄群居澹已忘分手  
景難寘晴江詠調慰羈孤箴切見風義驚心津梁疲矯  
首河山異補堂雲物豁靈襟游觀助奇氣但令水土諳  
毋使心力瘁具區恥上韓愈書懶挾禰衡刺獸行畏友  
朋令德保終始西顧晨鷄豈常暗修軫會一試合離境  
詎常出處事無亟心羅江浦尙楚風凱樂有橫吹莫悲  
行路難獨羨束裝易端人謀能蒐卒乘力可起彫勅作  
奏固在工依人豈爲媿元木入門羞擊裾前席每倒屣  
文章信有神風節庶不墜補堂幕府急羽書河堤蒞朝  
使翳唯慎固防要令息烽燧晴江古賢貴命名吾黨重  
氣類念之增煩悃思子日慘頽葦浦良工歛淬磨大冶

失鉗錘吾過謝不聞嘅焉動深喟具區翰林王國楨流  
覽盡金鎖方將宏遠謨豈慮辱高位西顯孝廉蘊壯猷  
屢挫竟無悲畫理叶元賞文筆實清粹心羅二妙聳天  
骨鉅手壓巽眉思精發神勇才餒輒心悸元木席帽仍  
吾徒羔裘羨彼其追逐雲龍間跌宕優笑地端人蘊靈  
妙結撰抒藻互餉饋硬語聲摩空歷歷皆可識晴江屹  
如高墉言銳如猛擊剗鏘如振韶鈞煥如結珮璫補堂  
五都璠璣陳五音宮商備拳拳見意深刺刺恐辭費董  
浦冰霜知爾歷風雨不予棄著論尙窮交讀易貞內比  
具區寒聲淅淅瀝夜色失幽邃放慵觸畫屏分光撒鐙  
幟元木饑烏窘踳踳黠鼠巧窺伺巡檐索枯梅開戶見

僵樵西顛餘興何飛騫詞源劇澎濞聊用救饑虛遑復  
役文字心羅旣非從軍行迴異上瀧吏且爲三年淹底  
用百憂萃晴江臨發仍分岐所惜不連騎溪山多勝情  
去去勿侘傺堇浦

風雨走訪杭堇浦

不防雲黑過街來坐久旋教借笠回竹外一鷄鳴向晦  
分明詩在不須催

題鄭履坡主事歸去來圖卽送歸里

君之王母我祖姑兩家並住城東隅君先驥躍我蠅附  
兩人並走長安路客居門巷總排連不異江鄉風雨聚  
跳丸出沒電火移越鳥棲側懷南枝我方托意沈約賦

畫郊居圖

君復寄興陶潛辭鑿成白絹解烏玦松菊紛披三

徑列柴桑景物宛然呈恰補吳興錢選缺

弁州畫跋錢選舉畫歸去來辭凡數

本此卷尤古雅第少却三徑就荒松菊猶存一段柴桑景

讀君畫畢爲君期明年二月連騎

歸功名縱爾異得失志願詎必分從違君今得歸輪已  
稀手擎黃帕身著緋視我欲退且籥觸造物不公難謗  
譏明朝誓亦買驢券望君後塵續初願先期寄語錢唐  
湖評花贈爵吾來俱

移居雜詩

自向前頭策蹇驢一人牽犬一擔書先生家具還何有  
枉借東家豕鼻車

倦游粗辦買山貲鱸膾秋風早定期三宿豈無桑下戀  
無不宣齋藁



爪痕何苦又輕遺

樞繩牖甕略添修階草垣苔盡可畱但把高樓勤鎖鑰

旅人從古怕登樓

新居有樓

誰先解事乞花栽可惜花時我未來多謝牆陰一株棗

玲瓏專待主人開

杜韋門巷傍城南五載棲遲紀短函更得長楊名字好

添將詩話亦殊堪

地名真楊弄

依然風土小杭州井脉潛分樹蔭周寄語士衡應發粲

西頭屋轉在東頭

俗呼予寓齋曰西翟寓家載清兄住對門呼東翟寓城南諸巷多杭人因名小杭州

天涯聚散本花塵飄撇隨他落溷茵尚有能詩許丁卯

苦相畱戀不嫌貧

同寓人各散去惟許聖裁獨畱

盛夏苦熱詩以自解

風谷閉火井熾蜥蜴甕封雨不至炎官澹威吁可畏從  
來南方北方涼暑異今年轉變出人意老翁頭白不曾  
經道路渴死紛相繼吾欲向深山逃轉憚路迢遙吾欲  
用寒泉澆復少人擔挑曉來卧地直至宵夜裡揮扇又  
連朝屏闌窻几榻寸寸如煎燒解衣已類裸人國流汗  
霏霏徧體成腥臊閣閣銅盞響聲聲耳根入不是飲冰  
難濟急昨日一錢今累十街鄰又有言明朝凌空將不  
給斯時出亦愁入亦愁既類涸轍之鮒又似喘月之牛  
推窗但覩赤日牛掃地爲祝金風秋清涼之術究何求  
吁嗟乎澄水帛招涼珠含風袍北風圖希世寶物安得

歸吾徒請君釋躁聆歌呼吾徒雖病病易蘓耕者在野  
負者在塗當天日頭烙其膚綠楊下忍耽須臾樂莫樂  
公侯孤冠裳役尙禮法拘吾徒上之不著朱與紫下之  
不執耒與耜終朝鍵戶艮其趾樹底簾櫳易移晷左浮  
瓜右沈李搖鷺褰淪鷹鵠人生知足爲佳耳妄生嗟怨  
殊過矣

金慎齋比部出關圖

萬歲龍蟠地山河控勢雄明駝宵卧雪健鶻曉呼風樹  
斷天關出沙平地界空未能乘一障枉自嘆途窮

過馬市

昔聞短長書冀北地多馬結市混千蹄充牣首函夏驪

駱駝驢騾赤白兼黃赭馬質務矜銜策試少嫻雅粗堪  
韉勒施屢急鞭箠打販夫及豪僕瞠目任取舍良蹇究  
何得養棘舍梧櫝可惜天驥材伏櫪但喑啞權鬣闇三  
花筋骨瘦一把昂頭欲噴訴恐類金躍冶步遲氣凋喪  
頓出駑駘下市梢三旦立見棄若土苴涓人不可作識  
者久已寡胡不捐棧豆跣跳大樂野予無增價力還顧  
亦聊且彼士尙宜然爲之一淚灑

曉枕偶占

二十五點漏殘一百八聲鐘起黑甜樂在其中黃妳味  
不及此

觀潮圖爲錢江聲上舍題

君家尙父雄南邦親彎强弩  
寧龍降靈潮掉頭不西擊  
沙河舊岸移鐵幢城東一掌著  
平行鄉鄰陸續興耕耒  
余家世業曲江里與君不越河之  
疇每逢秋來月魄盛  
海門激射雷砰聲風旗萬道驕  
馬佚雪山千尺神鰲扛  
高原置酒挾遠背大觀屈數無  
能雙卽今拋撇五六載  
耳底尙覺鳴琤琮偶然客舍百無  
事倚牀坐話秋荷釭  
君因發篋出絹素淋漓滿幅驚  
湍瀧家鄉絕景宛在目  
各憇歸思縈心腔終南山翁不可  
值安得頃刻乘飛艖  
蒲帆十幅君早辦江樓及拓玲瓏  
窻甫里送迎辭自麗  
羅刹奔突神應懽金隄千丈田百  
頃微禹豈不遭衝撞  
操觚勤述遠祖德補入歐史揚豐  
龐我歸尙擬作箋注

君試期我錢唐江

消寒社詠史分得蕭梁

樊鄧高呼振八戎  
新林一舉執梅蟲  
大裘素輦規模遠  
建鼓縣鐘粉飾工  
詔許贖金三就釋  
函陳謗木九關通  
秣陵王業偏安後  
文教居然數大同

居高未肯愛河捐  
梵住何能繼八禪  
宗廟爽靈除血食  
公卿蒙辱議身錢  
頻看法會無遮設  
普製金經大品傳  
底事長干新塢建  
轉教魔火化烽烟

掘尾狂獒肆毒淫  
青絲白馬壽陽臨  
圍城賦但尤朱异  
啟事封當憶賀琛  
焱騎突馳蔬圃爛  
雄藩高坐羽書沉  
淨居殿裏蜂脾絕  
了却平生未捨心

元圃風流冠省闈諸郎文采並清輝六通才艷吟宮體  
一目形殘識布衣進罷黃囊吞土驗囚來烏幔脫冠非  
轉畱餘運成高讓持較巴陵事不違